

## **Moga, o zuralo rom - Moga, a nagyerejű**

Írta: Rostás - Farkas György  
2012. január 24. kedd, 17:41 -

---

Varikana, kana le rom phirenas pa gaveste pe gaveste, sas jekh rom mashkar lende, Moga busholas. Kaj phirnas andekh foro, sas kothe jekh zuralo raklo, kon chi darajlas khonyikastar. Le foroske raja phendine le romenge, kana avri gele lende:

— Romale, shavale! Naj mashkar tumende kasavo zuralo manush, kon zhanelas te marel jekhe rakles? Ame dasas lestar, ke kasavo zuraloj, akarso kamas te keras lesa, chi birisaras ame lesa.

— Si kathe jekh rom, kon zuraloj, lesko anav Moga, de voj daral sakonestar.

— Phenen leske, te avel kaj o forosko kher, na avla les khanchi bajo!

Kana khere avilas, anda mangelipe, sas pasha leste jekh eftabershengo cino shavo, kon taltosho sas, ke dandesa rakhadyilas.

— Moga! — phendine le rom-Sigo zhas kaj o forosko kher, ke te na irigren tut andre.

— Me korkoro chi zhav!

— Mishtoj, vi ame zhasa tusa savorazhene.

Kade kerdyilas. Beshline po vurdon, haj Mogasa geline kaj o forosko kher.

## Moga, o zuralo rom - Moga, a nagyerejű

Írta: Rostás - Farkas György  
2012. január 24. kedd, 17:41 -

---

— Kathe som! — phenel o Moga romanes, ke voj chi zhanglas ungríka, numa romanes. O cino shavoro, kon lesa sas, boldas leski vorba. Akanak aba shaj avel kodo zuralo manush, ke o raklo kodi phendas, zhikaj chi arakhel jekh kaver zurale manushes, kon marela les, chi zhanel te xodinij. Mogas tordyardine avri vorta raklesa. Phenel o Moga:

— Anen mange jekh xaravlyi, de zuralyi t avel!

Andine leske jekh shelo. Krujal xutyildas pes shelesa, haj las bari sufla. O shelo shindyilas pes.

— Kado shelo naj lasho, t anen majzuralo!

Andine jekh vurdonesko perdal phanglo shelo. Vi kado krujal boldisardas pe peste, haj phurdelas jekh, de o shelo chi shindyilas pes.

— Kado shelo aba legmajfeder!

Kezdisardine te maren jekhavres. Moga numa chi kerdas khanchi, o raklo mardas les. Pe kadi o shavoro vorba das romanes.

— Moga, xutyl les, na muk tut, xutyl les kade, te merela!

Chi trubusardas majbut Mogaske, xutyildas les kade, sar lesko pashavro avri avilas po dumo. Kana muklas e rakles, khere ingerdas les, ki chi zhanglas inke chi te zhal.

— No Moga, so manges amendar, sa dasa tuke, ke kadi butyi kerdan.

## Moga, o zuralo rom - Moga, a nagyerejű

Írta: Rostás - Farkas György  
2012. január 24. kedd, 17:41 -

---

De o Moga chi zhanglas te mangel khanchi, inke vi kher dinesas leske, de voj numa bagova (duhano) manglas. Sode lyuvavencia sas manusha, kodolendar mangline o duhano. Jekh gono pherdo kerdyilas. Inke kodi manglas o Moga, sar shaj kerel mangelipe ando gav.

Phirdas, haj maglas pa kher pe kher. Jokhar kothe reslas kaj kado kher, kaj beshlas o raklo, kasa mardas pes, haj mardas les. Chi kamlinesas andre te muken les, de o raklo opre pinzhardas Mogasko glaso, haj phenel:

— Muri, dej, na nashaves kodole manushes, me pinzharav les, akhar les andre, haj de leske, so voj mangel. Moga andre avilas ando kher.

— Ashun Moga! Me inke chi dikhлом kasave zurale manushes, desar rakhadyilom. Xutyl muro vast, ke me mero, mashkar tye vast.

Xutylen jekhavreske vast, haj o raklo mulas.

Zhal karing khere po drom Moga, dikhel jekh lubenyicanca pherdi phuv. Bokhalo sas, haj so gindisardas pes, xala lubenyica. Angle las peski shuri, haj zhikaj shingerdas le lubenyici, kana jekh lashi kerdyilas. Kezdij te xal. Aven duj rakle, gornyikura sas, ke von dikhen Mogas, so kerel. Kethane phangline les, sar ingren kaj le shingale. Dorasa vi phangline Mogas, haj geline kaj o forosko kher. Kana avri resline kaj o barruno drom, so dikhen, avel o intenzevo, grofosko manush, haj voj dikhel kodo, duj rakle irigren le romes.

— So kerdas kado rom?

— Kethane shingerdas le lubenyici, haj akanak ingras ame kaj e shingale kadale romes.

— Azhukaren feri, maj me perdal dav les shingalenge.

## Moga, o zuralo rom - Moga, a nagyerejű

Írta: Rostás - Farkas György  
2012. január 24. kedd, 17:41 -

O grofosko manush tordyilas hintovosa (vurdonesa), duje grastenca. Pala vurdon phangline le Mogas, ashvaresa. Kana zhalas o vurdon, o shavoro vorba das Mogaske, ke vi akanak Mogasa phirdas.

— Xutyl Moga, na muk tut, xutyl les kade, o vurdon chi zhanel te mishkij!

Vi tordyile le grast, haj vi vurdon. Mogas mukline, chi ingerdine khatikaj.

Pala duj-trin kurke, pale gelas o Moga te mangel manro. Sas kothe pushes jekh bar, pherdoj drakhenga, kadi bar rajeski sas. Sas kothe jekh zolba, kaj beshlas jekh bari shipurka, jekh bari rajkani shipurka. Kado sap ingerdas gaveske bakren. Pe zolba avri sas iskirime, khonyik chi t avel akorde, ke o sap mudarel les. Moga chi zhanglas te ginavel, kothe gelas kaj e zolba. O shavoro lesa sas. Zhanas andre ande zolba, kana o shavoro phenel:

— Moga! Avel e rajkani shipurka! Le angle tyi royi, haj malav la, kade, te merela!

Sas Mogaske jekh bari royi. Jekh maladas pe rajkani shipurka, mulas. De kado sap zuralo sas, peska porasa kabor maladas, sar e kheresko zido jekh rig avri boldino kerdyilas. Moga avri avilas anda zolba. O gornyiko dikhlas kodo, kana Moga intya phirdas, de chi zhanglas so sas kothe. Kothe reslas lende.

— So kerdan kathe more?

— Somas andre ande kadi zolba te mangav manro!

— Chi darajlan kathar rajkani shipurka?

## Moga, o zuralo rom - Moga, a nagyerejű

Írta: Rostás - Farkas György  
2012. január 24. kedd, 17:41 -

---

— Na me! Mudardom la!

— Mudardan la?

— De ma pushke te na!

— Te dikhas la!

Kana dikhle le sapes, kon mulas, o gornyiko kodi phendas:

— Av manca kaj o grofosko manush, del tuke variso, love, xamasko. Kothe o gornyiko phendas, sar kado rom mudardas e sapes. O manush dikhlas, so si ando Mogasko vast. Jekh bari rolyi, jekh rikitasa avri cirdino kasht. Kodo sas leski rolyi.

— Ashun pe mande Moga! So doris mandar, dav tuke. Manges zolba, te na beshes ande cerha, mang so kames?

— Raja tyo baripe! Chi trubuj man kher, ke kodo kasavoj, sar e robija, majmishto mange e cerha. Numa but duhano den mange!

Jekhar o cino shavoro gelastar pasha leste. Khonyik chi zhanglas kaj gelas. Moga kothe sas kaj beshlas e kumpanija. But romane shavora sas krujal leste. Phendine leske.

## **Moga, o zuralo rom - Moga, a nagyerejű**

Írta: Rostás - Farkas György

2012. január 24. kedd, 17:41 -

---

— Moga, zha opre pe kasht, an amenge chiriklyaki kujburi, haj anre!

O Moga gelas opre, ke shavora dine les duhano. Kana opre zhalas po kasht, haj unzol pala kujburi, so dikhel, jekh sap sas ande kujburi. Muklas o kasht, haj tele perlas. Vi mulas.

Le cine shavores ingerdine le beng, kade Mogaski zor gelastar. Kado shavoro das les zor.